

ERRALDOI TXIKIEN FESTA



A.B

Altzo » XXII. Eskola Txikien Festaren lekuko izango da bihar. Ikasle, guraso, irakasle eta altzoarrek elkarlanean antolatu dute festa handia.

AGURTZANE BELAUNZARAN

Eskola Txikien festa handia ospatuko dute bihar Altzon. Urtebete daramate prestaketa lanetan eta nabaria da festaren usaina herrian. Agertokia plazaren erdi-erdian, karpak, apaingarriak kaleetan, ohikoa baino mugimendu handiagoa....

Pasa den urtean, Berrobiko San Andres eskolak lekukotza eman zienetik lanean ari dira. «Urtebete daramagu prestaketa lanetan, baina azken hilabeteak dira gogorrenak. Aste honetan, urduritasuna nabaria da gainera. Dena lotuta utzi nahi dugu eta bihar dena ongi ateratzea nahi dugu» azaldu du Mila Etxeberriak, Imaz Bertsolaria eskolako zuzendariak.

Laurehun biztanleko herrian, hirumila lagun espero dituzte. Herri txikia, handi bihurtuko da bihar. Egun handia izango da biharkoa altzoarrentzat.

«Gipuzkoako 27 Eskola Txikietako ikasleak gonbidatuta daude, baita Bizkaiko eskolabaterere. Eskola Txiki izan direnak ere etortzea

espero dugu» azaldu du Mikel Olano, Santilazpi Guraso Elkarte-ko lehendakariak.

Imaz Bertsolaria eskolako ikasleek eta gainontzeko Eskola Txikietakoek, txikitasunean handi direla ospatu nahi dute. «Txiki izanagatik ere, batzean indar egiteko ahalmena dugula erakutsiko dugu» dio eskolako zuzendariak.

Ekitaldiak txiki, guraso eta gazteentzat

Egitaraua zabala da oso. Goizean hasi eta iluntzera bitartean, bada zer ikusi eta gozatu Altzon. «Umentzako festa bada ere, gurasoentzako eta Eskola Txikietan ikasi duten gazteentzako egitaraua antolatu dugu» gaineratu du Olanok.

Txalapartaren deiak emango dio hasiera festari. Erlojuak, 10:30ak markatzen dituenen izango da. Oholtza gainean, Imaz Bertsolaria eskolako 5. eta 6. mailako ikasleek, koplak kantatuko dituzte. Eskola Txiki bakoitzari koplana bana abestuko diete. Herriaren izena entzuten dutenean, eskola

bakoitzeko ordezkariak, opari bat utzi beharko dutelarik oholtza gainean. Festa aitzakia hartuta sortu duten abestia ere aurkeztuko dute.

Ordubete iraungo du harrera ekitaldiak. Ondoren, haur jolasak egingo dira pilotalekuan. «Jolas kooperatiboak dira, bata besteari lagunduz parte hartu beharko dute. Ez da lehiarik egongo. Batak bestea behar baitu jolasa burutzeko»

Udaletxe azpian 9 ikaslerekin sortu zen eskola. Orain, 59 ikasle eta 10 irakasle daude

ko» argitu du eskolako zuzendariak.

Bazkal aurretik, lekukoa eskuz aldatuko dute. Altzok Abaltzisketari emango dio datorren urteko festaren ardura. Eskualdean geratuko da berriro Eskola Txikien Festa.

Bazkariaren txanda 14:30ean izango da. Mahaian eserita bazkari eder bat egin nahi duenak, pilotalekuan du lekua, prestatuko jana eskainiko baitute. Etxetik, janaria ekarri dutenek, plazako karpan bilduko dira.

Euskal Herriko pailazo ezagunetariok ere, Eskola Txikien fes-

» EGITARAUA

- **10:30ean.** Harrera ekitaldia herriko plazan.
- **11:30ean.** Haur jolasak eskola eta frontoian.
- **13:30ean.** Lekukoa eskuz aldatzea.
- **14:30ean.** Bazkaria: cateringa frontoian eta etxetik dakartenak plazan.
- **16:30ean.** Pirritx eta Porrotx pailazoak herriko plazan.
- **19:00etan.** Lain taldea herriko plazan.
- **20:30ean.** Bertsolariak herriko plazan. Festari agurra.
- **21:00etan.** Oinazez erromeri taldea (22:00ak arte)

Egun guztian zehar....

Puzgarriak, erakusketak, eskulan tailerrak, kars-ak, rokodromoa, konpartsa, kalejira....



tara hurbilduko dira. Pirritx eta Porrotxek Altzoko eskolako ikasle, guraso eta irakasleekin dantzatuko dute oholtza gainean. Gero, bildutako guztiak aho zabalik edukiko dituen emanaldia eskainiko dute.

Gazteen tartea, iluntzeko zazpitan izango da. Lain taldearen kontzertuarekin, eskualdeko gazteak erakartzea dute helburu. Oholtza gainean, musika taldeak amaitzean bertsolarien txanda etorriko da. Sorozabalek eta Irakuz, balkoitik botako dituzte bertsoak, era zaharrean. 22:00ak bitartean luzatuko dute festa Oinazez taldekoek.

Egunean zehar hala ere, sorpresak izango dira. Altzoarrek prestatuko antzerki emanaldia tarteko. Altzoko Erraldoiak, Imaz Bertsolariak, Txirritak eta beste hainbat pertsona ezagunek ere, festaren lekuko izan nahi baitute; astoa eta gurdia lagun agertuko dira plazan.

Eguraldia beste protagonista

Zerura begira daude antolatzaileak. Eguraldiaren iragarpena ez baita oso ona. Baina, konponbidea jarri diote altzoarrek. Festa eta giro ona ez du ezerk eragotziko. Karpa handiak jarri dituzte herriko puntu ezberdinetan eta denentzako le-



AB



AB

kua izango dela azpimarratu du Mikel Olanok.

Bestalde, bi aparkaleku egokitu dira, bata Alegiako industrigune berrian, bestea Txaraman. Autoak bertan aparkatu eta bost autobus ibiliko dira joan etorrian, 10:00eta-tik 22:30era.

Herritarren sormena eta lanerako gogoia

Antolaketa lanetan herritarrek izan duten inplikazio azpimarratu du Olanok. «Hasieratik, herriko elkar-teak, irakasleak, gurasoak eta Udala elkarlanean aritu gara. Herri guztiaren festa izatea nahi genuen eta lortu dugula uste dut», dio.

Herritarrek lanerako erakutsi duten kemena behin eta berriz azpimarratzen du Santilazpi Guraso Elkarteak. «Jendeak duen sormena ikaragarria izan da, ideiak sortu eta gauzatu dituzte, gainera. Erraldoiaren antzerkia herritik sortutako ideia bat da».

Ametsak gauzatzuz

Hamabi urte pasa dira herriko eskolak, atea ireki zituenetik. 1998ko irailean, 9 ikasle estreina-tu zuten udaletxe azpiko eskola. «Gurasoek herrian eskolaren beharra ikusi zuten, gabezi hau Udalari adierazi eta eskola sortzeko pausuak eman ziren» esan du Olanok. Herriko eskolaren lehen pausuak ziren hauek. Hurrengo urte-tan, udaletxeko gela hau txiki geratu zitzairen, Udalak beste gela bat eman zuelarik.

9 ikaslekin hasi zen eskolak, gaur 59 ikasle ditu, 10 irakasle eta eraikin berria. Lau urte dira eskola berrian daudela. «Eskola zoragarria da, argitsua, handia...», dio eskola berriko zuzendariak.

Haur Hezkuntzako bi gela eta Lehen Hezkuntzako hiru ditu Imaz Bertsolaria eskolak. «Zikloka daude geletan, adin ezberdine-

Eguraldi txarra egiten badu ere hartu dituzte neurriak: Karpa azpian egingo dira ekitaldiak

tako ikasleak nahastuta. Eramatan ditugun proiektuak ere oso aberasgarriak dira. Umeek eginkizun ezberdinak hartzen dituzte; handienek txikienei laguntzen die. Eskola Txiki izateko arrazoietako bat hau da», azaldu du Josebe Rezola ikasketa buruak. Horrez gain, informatika, psikomotrizitate eta jangela ditu. Baita, patio eder bat ere.

Herri bakoitzak bere eskola izatearen garrantzitsua behin eta berrin nabarmendu dute antolatzaileek. «Herrian eskola izatean, umeak bertan geratzen dira. Arratsaldetan pilotan, bizikletan... jolasten dute kalean. Altzok eskola ez balu, lo egiteko herria bakarrik litzateke, umeak eskolan herri-kanpo eta baita gurasoak ere, lana dela eta» dio Mikelek.


Eskola Txikien lema horixe: *Eskola Txikiak bizirik, herri eta auzo txikiak bizirik.*



AB



AB



SARIDUNAK

Irurako Ikastolaren alde
IRRIEN LAGUNAK
Pirritx eta Porrotx-en ikuskizuna ikusteko
sarreraren sariduna

Maria Angeles Ezeiza Tapia (Tolosa)

Ekainaren 16an • Asteazkena • 18:00ean
Irurako pilotalekuan

Sarrerak lehiatilan harpidedun txartelarekin